

**Date – 02/03/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Tourism Department chuan khawtlang behchhana zinmite hip (Community Based Tourism) a kalpui mek thu Tourism Minister Pu Lalnghinglova Hmar chuan a sawi.
2. Mizorama Ṭhalaite intawhkhawmna lian ber KṬP Gen Conference vawi 61 na chu nizan khan a ṭiak a, Palai kal tam ber tum nia hriat a ni.
3. Myanmar raltlan Mizorama awmte an mitnaute leh kutze thla hmanga chhinchhiahna kalpui chu za zela 97 chuang zawh fel a ni tawh.
4. Iran beihna thleng vangin India chuan Israel-a India mi awmte chu fimkhur tur leh inralring renga awm turin a ngen.



**ASSEMBLY-TOURISM**

Tourism Department chuan khawtlang behchhana zinmite hip (Community Based Tourism) a kalpui mek thu Tourism Minister Pu Lalnghinglova Hmar chuan a sawi.

Rorellai ZPM member Lt. Colonel Clement Lalhmingthanga chhangin Minister chuan hemi hnuaiah hian tourism-a theihna nei khuate, state pawm mikhualte'n an tlawh thin khuaah te helama thiamna nei tura inzirtirna buatsaih thin a nih thu a sawi a. Heng hunah hian VC leh tlawmngai pawlte (a khaw mipuite hnena zirtirna lo pechhawng theitu tur) bakah Tourism Industry a eizawngte koh khawm thin an nih thu a sawi a. Tourism hmanga an khawtlang leh an nitin eizawmna a puih theih dan turte, khualzin lo dawnsawn dan leh mikhualte chungga that chhuah pawimawhna te zirtir thin an ni, a ti.

Mikhual lo thlengtu riahbuk (Hotel) leh Homestay, guesthouse, chawdawr, cafe, zinmite lo buaipuitu, zinmite kaihruaitu, taxi khalhtu, local council hruaitute leh youtuber leh mi kaihruai theitute hnenah helama thiamna nei tura inzirtirna neihpui tur a ruahmanna siam a ni, a ti a. He'ng bakah hian khualzin tlawh thin khua leh khualzin hip thei tur khuahte hmalak chhoh zel tum a nih thu a sawi bawk a ni.



**ASSEMBLY SESSION**

Vawiin chawhma dar 10 leh a chanve atanga Assembly Budget session chhunzawmin a tlangpui a Budget sawihona hun hman a ni ang.

Vawiin Assembly inkhawmah hian zawhna leh chhanna hun hman a ni ang a. Chumi zawhah Chief Minister Pu Lalduhoma'n Comptroller & Auditor General of India (CAG)-in Mizoram sorkar chungchanga report a siam pathum - Finance Accounts 2024 – 25 Volume I leh Volume II bakah Appropriation Accounts 2024 – 25 te chu House dawhkanah a dah ang a. Tourism Minister Pu Lalnghinglova Hmar-in The Mizoram (Registration of Tourist Trade) (Amendment) Rules, 2026 leh Guidelines for Tour Guides in Mizoram (Amendment) te chu House dawhkanah a dah bawk ang a. Hemi hnu hian tangka kum thar (2026-2027) Budget a tlangpui a sawihona tan a ni ang a, sawihona hi Thawhlehi khian zawhfel hman tum a ni dawn a ni.

<><><>

## **KTP GENERAL CONFERENCE**

Mizorama Thalaite intawhkhawmna lian ber KTP Gen Conference vawi 61 na chu nizan khan a tiak.

Ni 4 awh KTP Gen Conference tiak zan hian Pandal ah vantlang Pathian biak inkhawm a awm a, Leader kal chhuak Rev H Lalawmpuia hnen atangin Pathian thuchah ngaihthlak a ni a, Synod Moderator Rev John Raldosanga'n kum 2026-2028 chhunga Central KTP hruaitu a hlan bawk a ni.

Fakna inkhawm hman a nih zawhah KTP Gen Conference hi nizan zanlaihah khan a tiak a, palai thahnem tak chu Pathianni zan zanlai pelhah an haw nghal a ni.

*Kumin Gen Conference hi palai kal tam ber tum niin hriat a ni a, mikhuat thleng chhinchhiahtuten an lakkhawm theih chinah mi 53,638 an tling a, inkhawm that ber tum ni thin, Pathianni zanah hian mi 60,000 vel pandal leh a chheh velah an pungkhawm niin chhinchhiah a ni bawk.*

*Mizoram Sawrkar GAD in thuchhuah siamin Saitual town huam chhunga Sawrkar depts leh Zirna in zawng zawng chu vawiin March 2 Thawhtanni hi Inkhawmpui hmunhma te singsak nan chawlh a puang bawk a ni.*

<><><>

## **ASSEMBLY-LABOUR CESS**

Labour, Employment, Skill Development & Entrepreneurship (LESDE) Minister Pu Lalnghinglova Hmar chuan kumin January ni 31 thlenga Mizoram Building & Other Construction Workers Welfare Board (MBOCWWB) in kum kal meka Labour Cess a dawn zat chu cheng vaibelchhe sawmthum pakhat nuai sawmhni paruk singkhat sangkua zahni sawmli pakhat a ni, a ti.

Dr. K. Beichhua zawhna Assembly inkhawma a chhanna-ah Pu Lalnghinglova Hmar chuan hamthatna dawng thei tura Welfare Board a inziaklut mi 31,036 an awm mek thu a sawi a. Sorkar kum kal mekah Welfare Board hnuai hamthatna dawng mi 12,494 an awm tawh a. Labour Cess dawn atanga pawisa pekchhuah tawh zat chu cheng vaibelchhe zathum panga nuai sawmruk paruk singkua sangruk zruk sawmnga pakua a nih thu a sawi bawk a ni. Zawhna dang chhangin LESDE Minister chuan MBOCWWB hnuai kumin February ni 10 khan hna thar siama eizawna lam kalpui tur Project thar pahni “Eizawna Kailawn” leh “Rahbi Chertu” chu hawn a nih thu a sawi bawk.



**BIOMETRIC ENROLMENT**

Myanmar raltlan Mizorama awmte an mitnaute leh kutze thla hmanga chhinchhiahna kalpui chu za zela 97 chuang zawh fel a ni tawh.

Home department atanga thu dawn danin Myanmar raltlan Mizorama awm mek mi 28,355 zinga mi 27,574 te chu an mitnaute leh kutze thla hmanga chhinchhiah an ni tawh a, chhin chhiah tawhte hi za zela 97 point 25 a tling tawh a. Myanmar raltlan awm tamna ber Champhai district bakah Aizawl, Lunglei leh Serchhip district-ah te chuan biometric enrolment hi zawh fel a ni tawh a. Raltlan awm tamna ber dawttu Lawngtlai district-ah pawh za zel a 96 point 74 zawh fel a ni tawh. Lawngtlai district-ah hian Myanmar raltlan 5,034 an awm mek a, an zinga mi 4,870 te chu chhinchhiah a ziahluh an ni tawh. He tih lai hian district dang, Kolasib, Saitual, Mamit, Hnahthial, Khawzawl leh Siaha district-ah te chuan kuminah biometric enrolment hi an chhunzawm hauh lo niin a lang a. Home department hotute chuan a chhan an hriat bik loh thu Akashvani News, Aizawl an hrih.

Mizoramah hian Bangladesh atanga raltlan mi 2,360 an awm mek a. Lawngtlai district-ah tam berin mi 2,042 an awm a, Serchhip district-ah 235, Lunglei district-ah 76 leh Aizawl district-ah 7 an awm bawk. Serchhip, Lunglei leh Aizawl district-a Bangladesh raltlan awmte hi biometric enrolment tih zawh vek a ni tawh na a, Lawngtlai district a mi 2,042 zinga 183 chauh chhinchhiah an la awm avangin Mizorama Bangladesh raltlan chhinchhiah zat hi za zela 21 point 23 chauh a la ni.



**AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



**ASEMBLY-ASF**

Kum 2025-2026 ah African Swine Fever (ASF) vawk pulhri leng vangin vawk 9,711 a thi a, vawk 3,615 suat a ni bawk.

BJP member Dr. K. Beichhua zawhna chhangin Animal Husbandry & Veterinary Minister Pu C. Lalsawivunga chuan tun tangka kum lai a ASF hri leng vanga vawk 9,711 a thih thu leh vawk 3,615 suat a nih thu hi a sawi a. Disaster Management & Rehabilitation DM&R atanga khuarel chhiatna a puan a nih hnuah zangnadawmna cheng vaibelchhe 4 nuai 77, leh sang 8 vawk pulhri vanga vawk chante hnenah District Disaster Management Authority kaltlanga pek chhuah a nih thu a sawi.



**INDIA ISSUES ADVISORY**

Iran beihna thleng vangin India chuan Israel-a India mi awmte chu fimkhur tur leh inralring renga awm turin a ngen a, Israel thuneitute leh Home Front Command

atanga thuchhuakte ngaihvena, tha taka zawm turin a ngen a, rikrum thilah Tel Aviv-  
a Indian Embassy be turin a hriattir bawk.

Air India chuan West Asia-a an thlawhna service zawng zawng, a ti tawp  
lailawk nghal a, Indigo Airlines pawhin he biala an thlawhna thlawk turte, zanlai  
thleng a cancel bawk a, passenger-te chu an ticket man, a zavaia pek let an nih tur  
thu an sawi bawk.

<><><>

#### CLASHES IN PAKISTAN

Pakistan-a Karachi khawpuia US Consulate pana kawngzawh tute leh police-  
te inbeihna thlengah mi 10 an thi a, midang engemawzatin hliam an tuar bawk. US  
leh Israel sipaite chetnaa Iran ram hruaitu lu ber, Ayatollah Ali Khamenei-a thah  
anah duh loh entir nan Karachi-ah hian mipui tam tak an pungkawm a, a tam zawk  
chu Shia Muslim an ni. Indan buaina thleng avang hian Karachi pumah venhimna  
khauh tak ruahman a ni.

<><><>